

## **Ու՞ր էր Մելգոնեանը Յեղասպանութեան 90-ամեակի ոգեկոչման ձեռնարկներուն**

Այս տարի Մելգոնեանը չմասնակցեցաւ Յեղասպանութեան ոգեկոչման ձեռնարկներուն: Ի՞նչ էր պատճառը: Ըստ «ըսի-ըսաւ»Ներուն, Մելգոնեանի Տնօրենութիւնը արգիլեց իր աշակերտներուն մասնակցութիւնը: Բայց ասիկա ինչպէս կարելի էր, երբ տարիներէ ի վեր դպրոցը եւ իր աշակերտութիւնը կանոնաւոր կերպով իրենց մասնակցութիւնը բերած են Ապրիլ 24-ի յիշատակի ձեռնարկներուն:

Պատասխանը պարզ է եւ յստակ: Կազմակերպիչ «համագաղութային» ոգեկոչման յանձնախումբին մեծամասնութեան որոշումով Մելգոնեան Կրթական Հաստատութիւնը չեր հրաւրուած որովհետեւ Մելգոնեանի մասնակցութիւնը «անսմակարդակ» որակաւորում պիտի բերեր հանդիսութեան: Դեռք էր «որակաւոր» բաներ ներկայացնել, եղեր: Եթէ այս էր յանձնախումբին իսկական նպատակը, կրնային պարզապես «համագաղութային» ոգեկոչման յանձնախումբին անդամներէն ներկայ գտնուիլ Մելգոնեանի «Երգ ու Պար»ի հանդեսին Ապրիլ 8-ին, կամ Ապրիլ 20-ի Յեղասպանութեան ոգեկոչման ձեռնարկին:

Եթէ յանձնախումբին անդամները ազնուութիւնը ուսենային ներկայ ըլլալու, բեմին վրայ պիտի տեսնեին որակաւոր հանդիսութիւն մը, եւ ոչ թէ ձանձրացուցիչ ճառեր, որոնցմէ շատ լսած ենք:

Ուրեմն, յստակ է որ այս «համագաղութային» յանձնախումբը ուզեց Մելգոնեանը հեռու պահել 90-ամեակի ձեռնարկներէն:

Ինչու՞ սակայն: Չե՞ որ Ապրիլ 24-ը բոլորիս միասնականութեան խորհրդանշիշն է:

Կիպրոսէն ներս, ընդունիք կամ ոչ, Մելգոնեանը եղած է խորհրդանշիշը հայութեան: Մելգոնեանն է որ տարիներէ ի վեր հայ երգը ու պարը պահպանած է: Սակայն, այս վերջին խտրականութիւնը վտանգաւոր հետեւանքներու հասած է: Արդէն, այս «ըսի ըսաւ»Ներուն եւ դիտումնաւոր սուստ տեղեկութիւններուն պատճառով տասնեակ մը տաք գլուխ երիտասարդներ, Ապրիլ 23-ի իրիկունը Մելգոնեան «արշաւեցին» բացատրութիւններ պահանջելով: Մեկ ժամէ աւելի բուռն վեճէ մը եւ բաւական ծանր խօսքերէ ետք, երիտասարդները համոզուեցան կազմակերպիչ յանձնախումբին առած որոշումին՝ Մելգոնեանը հեռու պահելու նպատակով:

90-ամեակի առիթով աշխարհի ամեն կողմ եղանք մէկ սիրտ, մէկ հոգի, բացի կիպրոսէն: Կայ աւելի կարեւոր հարց մը քան թէ Մելգոնեանի «մակարդակը»: Այն ալ այս որոշումը առնողներուն խղճի խայթը: Այն անձերը որոնք չկրցան Մելգոնեանի հանդես երախտապարտ զգալ: Այն անձերը որոնք շահ ունին Մելգոնեանի փակման որոշումէն: Անոնք այսօր փախուստ կու տան իրենց խղճի խայթէն եւ չեն ուզեր նոյնիսկ Մելգոնեան անոնք լսել: Սա արդէն ողջ աշխարհը գիտէ:

Անոնք միայն չմոռնան թէ իրենց խղճի խայթը իրենց պիտի հալածէ մինչեւ գերեզման:

Գրիգոր Տէր Պետրոսեան  
«Սրտով Մելգոնեանցի»